

दिनांक 09.06.2024

समय: 18.35 बजे

आकाशवाणी जयपुर—अजमेर

प्रादेशिक समाचार।

○ एनडीए संसदीय दल रा नेता नरेन्द्र मोदी आज सिंज्या लगातार तीजी बार प्रधानमंत्री ओहदा री शपथ लेवेला—मंत्रिपरिषद् री शपथ ग्रहण आज।

○ वीर शिरोमणि महाराणा प्रताप री जयंती माथे आज प्रदेशभर मांय वांने श्रिद्धा रे साथे याद करी ज्या।

○ आईसीसी टी-20 क्रिकेट विश्व कप मांय आज भारत रो मुकाबला पाकिस्तान उं।

अर

○ प्रदेश रा घणकरा हलकां मांय तापमान मांय कमी उं लोगां ने गर्मी उं मिल्यो आराम—काले उं प्री—मॉनसून री बिरखा रो अंदाजो।

000

एनडीए संसदीय दल रा नेता नरेन्द्र मोदी लगातार तीजी बार अवे उं थोड़ी देर पछे प्रधानमंत्री ओहदा री शपथ लेवेला। कार्यक्रम मुजब राष्ट्रपति द्रौपदी मुर्मू सिंज्या सवा सात बज्यां राष्ट्रपति भवन मांय होवण वाळा जळसा मांय वांने ओहदा अर गोपनीयता री शपथ दिरावेला। ई मौके भारतीय जनता पार्टी रा सहयोगी जनता दल यूनाइटेड, तेलुगू देशम पार्टी अर दूजा घटक दलां रा सदस्यां रे नुवा मंत्रिमंडल मांय शपथ लेवण री आस है। शपथ ग्रहण जळसा मांय बांग्लादेश, श्रीलंका, भूटान, मॉरिशस, मॉलदीव अर नेपाल समेत केई देशां राष्ट्राध्यक्ष अर दूजा मेहमान भेळा व्हेला। राज्यपाल कलराज मिश्र ई जळसा मांय हिस्सो लेवण सारु दिल्ली पूग गया है। वटे ई मुख्यमंत्री भजन लाल शर्मा ई दिल्ली मांय है।

इण उं पैला मनोनीत प्रधानमंत्री श्री मोदी आज पीएम रेहवास माथे संभावित मंत्रियां ने बुलाया। आं मांय शिवराज सिंह चौहान, किरण रिजिजू, जितिन प्रसाद, जीतन राम मांझी, चिराग पासवान अर रामदास अठावले समेत केई दूजा नेता पूग्या। प्रदेश उं अलवर सांसद भूपेन्द्र यादव अर दूजा केई नेतावां रा नाम ई संभावित मंत्रियां री सूची मांय भेळा बताया जावे। श्री मोदी आज नुवी दिल्ली मांय महात्मा गांधी री समाधि ठोड़ राजघाट अर पैली रा प्रधानमंत्री अटल बिहारी वाजपेयी री समाधि ठोड़ सदैव अटल माथे श्रद्धांजलि अर्पण करी। श्री मोदी राष्ट्रीय युद्ध स्मारक माथे ई पुष्पांजलि अर्पण

करी। राष्ट्रपति भवन मांय होवण वाळा शपथ ग्रहण जळसा रो आकाशवाणी उं सीधो प्रसारण कर्यो जाएला।

ओ प्रसारण आकाशवाणी लाइव न्यूज चैनल माथे सिंज्या पौने सात बज्यां उं व्हेला। आकाशवाणी रा यूट्यूब चैनल माथे ई इण रो सीधो प्रसारण होवेला।

000

कांग्रेस संसदीय दल री अध्यक्ष सोनिया गांधी कयो है के संसद मांय वारा दल री तादाद मांय उल्लेखजोग बढवार व्ही है। आज नुवी दिल्ली मांय कांग्रेस संसदीय दल री मीटिंग मांय वणां कयो के लोकसभा मांय तो कांग्रेस एक बड़ी पार्टी व्हेगी है, इंडिया गठबंधन रा घटक दलां उं इण रे और बत्ती मजबूती ई मिलेला। श्रीमती गांधी कयो के भारत जोडो यात्रा अर भारत जोडो न्याय यात्रा री पहल ऐतिहासिक ही, जिण उं पार्टी हर थर माथे मजबूत व्ही है।

000

वीर शिरोमणी महाराणा प्रताप की जयंती रे मौके आज प्रदेशभर मांय न्यारा—न्यारा आयोजन व्हे रिया है। टोंक मांय केई सामाजिक संगठनां कानी उं महाराणा प्रताप री मूरत माथे फूल चढायी ज्या। डुंगरपुर मांय हवन रे साथे प्रार्थना सभा राखी ज्यी। वठे ई रक्तदान शिविर मांय लोगां 100 युनिट उं बत्ती रक्तदान कर्यो। बूंदी, केकड़ी अर झुंझुंनू रा बुहाना मांय महाराणा प्रताप जयंती रे मौके शोभाजात्रा निकाळी ज्यी। सलूमबर जिला मांय ई मौके केई ठोडा कार्यक्रमां रो आयोजन व्हीयो। महाराणा प्रताप री निर्वाण थळी चांवड रे साथे ई दूजा कस्बां मांय ई कार्यक्रम व्हीया। भरतपुर री महाराणा प्रताप कॉलोनी मांय पार्क मांय महाराणा री मूरत ने गंगाजल उं स्नान करार फूल अर्पण करी ज्या।

ई मौके लोगां ने महाराणा प्रताप रा शौर्य री गाथावां सुनाई ज्यी। महाराणा प्रताप जयंती रे मौके राज्यपाल कलराज मिश्र अर मुख्यमंत्री भजन लाल शर्मा प्रदेशवासियां ने शुभकामनावां दी हैं।

000

आईसीसी टी 20 क्रिकेट विश्वकप मांय आज जानी मानी प्रतिद्वंद्वी भारत अर पाकिस्तान रे बीचे मुकाबलो खेला जाएला। भारत रा बगत मुजब रात आठ बज्यां अमेरिका मांय न्यूयॉर्क रा नासाउ काउंटी स्टेडियम मांय ओ मैच व्हेला। भारत री टीम मैच ने जीत र सुपर आठ

मांय आपरी ठोड़ पक्की करण रो मौको है, जदके पाकिस्तान री टीम आपरो पैलो मुकाबलो अमेरिका री टीम उं सुपर ऑवर में हार चुकी है। दूजी कानी भारत री टीम आयरलैंड साथे खेली ज्यो पैलो मैच जीत चुकी है। इण मैच ने लेर क्रिकेट प्रेमियां मांय घणो उमाव देख्यो जावे।

000

देश मांय बणायी ज्या नुवा तीन आपराधिक कानून एक जुलाई 2024 उं लागू व्हे जावेला। आं कानूनां रा बारा मांय जाणकारी देवण सारु आकाशवाणी समाचार जयपुर कानी उं प्रादेशिक समाचार बुलेटिन मांय नुवी कड़ी चलायी जाए री है। आज आपां जाणा न्याय का “डिजिटलीकरण, सक्षमता और विश्वसनीयता बढ़ाना” मुद्दा माथे नुवा कानून मांय करी ज्या खास प्रावधान रा बारा मांय।

भारतीय नागरिक सुरक्षा संहिता 2023 एक तेज अर साफगोई न्याय प्रणाली रो वादो करतां अपराध री ठोड़ उं ले र जांच अर मुकदमा ताई प्रौद्योगिकी री सरुआत करी ज्यी है। प्रौद्योगिकी ने भेळा करण उं आपराधिक न्याय प्रणाली ने आधुनिक बणावण अर आधुनिक वैज्ञानिक प्रौद्योगिकी री ताकत ने काम मांय लेवण कानी एक महताउ कदम है। ध्यानजोग है के नुवा कानूनां मांय इलेक्ट्रॉनिक अर डिजिटल साक्ष्य ने मानण सारु पारम्परिक दस्तावेज साक्ष्य री तरह मानी ज्या है। दस्तावेजां री परिभाषा मांय सर्वर लॉग, ठोड़ रा बारां मांय साक्ष्य अर डिजिटल आवाज संदेश ई भेळा है।

000

मुख्यमंत्री भजनलाल शर्मा कयो है के प्रदेश मांय जल जीवन मिशन रे तैत सगळा घरां ने नळ री मार्फत साफ पीवण रो पानी मुहैया करावणों सरकार रो लगस है। ई सारु रोज रो काम तय करतां बत्ती उं बत्ती घरु नळ कनेक्शन देवण री रफ्तार बधाई जावे, जिण उं राजस्थान जल जीवन मिशन मांय देश रा अगुवा राज्यां मांय भेळो व्हे सके। श्री शर्मा आज मुख्यमंत्री कार्यालय मांय जल जीवन मिशन री समीक्षा मीटिंग मांय बोलता मुख्यमंत्री कयो के ई परियोजना मांय आगे कर्या जावण वाळा कामां मांय पाणी रा सोतां री पैला उं जाणकारी करी जावे। वणां कयो के जल जीवन मिशन री कामयाबी ई बात माथे निर्भर करे के पाणी रा स्रोत रा बंदोबस्त किण तरह कर्या जावे।

000

प्रदेश मांय काले उं मॉनसून पैला री बिरखा सरू व्हे सके है। मौसम केन्द्र जयपुर रा निदेशक राधेश्याम शर्मा बतायो के आवता तीन दिन कोटा अर उदयपुर संभाग रा छह जिलां उदयपुर, प्रतापगढ़, चित्तौडगढ़, डूंगरपुर, बांसवाडा अर झालावाड मांय आंधी अर बिरखा रो मौसम बण्यो रेवेला। श्री शर्मा बतायो के मॉनसून महाराष्ट्र मांय दाखिल व्हे चुक्यो है अर काले उं राजस्थान रा दिखणाद हलकां मांय धीरे-धीरे बधणो सरू व्हे जाएला। ई बीचे आथूणी विक्षोभ रा असर उं आज सिरोही, उदयपुर, बीकानेर, नागौर, जैसलमेर, जोधपुर अर अजमेर जिलां मांय कठे ई कठे ई मेघगर्जन अर हवा रे साथे छांटा छिड़का रो अंदाजो है। काले उं कोटा अर उदयपुर संभाग मांय कुछ ठोडा आंधी अर मेह री गतिविधियां दर्ज होवण अर दूजा हलकां मांय मौसम सूखो रेहवण री आस है।

000

जेईई एडवांसड री परीक्षा रा नतीजा आज एलाण कर दीरी ज्या है। इण मांय कोटा मांय कोचिंग ले रिया वेद लाहोटी ऑल इंडिया पैली रैंक हासिल करी है। लाहोटी 360 मांय उं 355 नम्बर ला र आ कामयाबी हासिल करी है। आईआईटी गुवाहाटी कानी उं कराई ज्यी जेईई एडवांस परीक्षा नतीजा एलाण होवण रे पछे देश री कोई 23 आईआईटी री करीब साढे 17 हजार सीटां माथे पढेसरां ने दाखिलों मिल सकेला। ई परीक्षा मांय एक लाख 82 हजार उं पढेसर भेळा व्हीया।

000

आज अंतरराष्ट्रीय अभिलेख दिवस है। इण रो आयोजन रिकार्ड अर अभिलेखां ने लांबी बगत तांई हिफाजत उं राखण रा महतउ रे प्रति लोगां रो ध्यान दिरावणो है। साल 2004 मांय आस्ट्रिया री राजधानी वियना मांय व्हीया अंतरराष्ट्रीय सम्मेलन मांय दुनियाभर उं दो हज़ार उं बत्ती लोगां भागीदारी करी ही। इणी सम्मेलन मांय अंतरराष्ट्रीय अभिलेख दिवस मनावण रो संकल्प पारित करी ज्यो हो। ध्यानजोग है के पैलो अंतरराष्ट्रीय अभिलेख दिवस साल 2007 मांय मनायी ज्यो हो।

000

प्रदेश मांय व्हीया न्यारा-न्यारा हादसां मांय दो लोगां री मौत व्हेगी। केकडी रा भिनाय हलका मांय खेड़ी गांव मांय बिजली रा खंभा मांय करंट आवण उं लाइनमैन री मौत व्हेगी। वठे ई दूजा हादसा मांय बूंदी जिला रा सिलोर गांव मांय बिजली लेण मांय शटडाउन

करणे काम कर रिया हेल्पर करंट लागण उं झुळस ग्यो, जिण री इलाज रे दौरान मौत व्हेगी। एक-दूजा हादसा मांय नीमकाथाणा रा कोतवाली हलका मांय दो कारां री टक्कर मांय सात लोग घायल व्हे ग्या।